

觀象居易傳箋

觀象居易傳箋卷第七

三三山下有澤。損君子以愆忿窒欲。損益乃成。恆之上下易而卽相對者。咸通於虛。而情感卽有損之理。恆應以實。而道久卽有益之理。其損何也。咸之虛受。受以氣。氣故以感應而通。損之上行。行以質。質故以高深而判。而山下之澤。又非山下之泉可比也。泉得天氣。其出不窮。澤乃壅坎。澤受土淤。而山亦爲澤。蒸而削。此損象也。君子觀兌以兩陽而抑三陰之下。忿所不免也。而以泰坤之兌。又來居乾之艮位。則忿以決而懲矣。艮以一陽而畜三陰於內。欲或不禁也。而以泰乾之艮。又往居坤之兌位。則欲以止而窒矣。由懲與窒而損之又損。以至於無損。所以爲德之脩也。

初九已事遄往无咎酌損之

已事遄往尙合志也。卦利攸往。乾至三而後有往。初無往也。初本泰乾之震。又與泰三之互震而往者。其志本同。初居民位。其於損

下之事。知爲己身分內之事。已者對人而言。艮象人。則初稱已矣。動出於悅。是以過往。初與四皆言過者。過乃咸速之謂。損由咸易。故於兌艮之初爻言之。猶之益上言勿恒也。輸將踴躍。義當无咎。傳言尙者。上九也。取水曰酌。三往上成兌。兌爲澤而附決。乃斟酌之義。之字指初而言。往者在民。酌者在上。初志在君。上志自在民耳。傳於三陽皆曰志。蓋益上獨指上九而上行之道。則三陽志同。志卽象所謂孚也。

九二利貞。征凶。弗損益之。

九二利貞。中以爲志也。二亦未損而已。進於初。其利不在往而在貞。時以貞爲可。故利也。互震爲征。征則失貞而凶。凶乃元吉之反。二與初同無所往。初弗損而言損。二弗損而并言益者。損益二卦其判在二五兩爻。故二五俱在損言益。二往居五。卽成益。而二以征爲凶者。損益貴得其中。二惟以中爲志。則其無所往者。正以弗

損得益之道之指陰爻言也。

六三三人行則損一人一人行則得其友。

一人行三則疑也。

卦列四美分見諸爻五曰元吉初四上曰无咎。

二上曰貞曰利卦由三成而三獨無之蓋損在剛而三則柔也益在上而三又下卦也故但以卦所由成者言之人位言人互震言行在損言損相易爲友相應爲得乾之三陽三人也乾三往上損其一矣損由於行乾之一人行而上坤之一人行而下一與一爲二凡物二爲友三爲羣得友正與得臣相應上在上爲友三在下爲臣傳言三則疑者以一人得一友再加一焉卽爲三陽不可再損陰不可再益疑與孚反得友卽有孚之謂也。

六四損其疾使遄有喜无咎。

損其疾亦可喜也。凡易之疾皆巽象四本泰坤之巽爻故云其疾。四當益而乃損者損以遠害損其疾正以爲受益地也泰三未往。

凶有乘剛之疾。伏坎加憂。於何得喜。三往上而疾止矣。四當互坤。伏離之中。人身以火爲體。互震則健疾止而身健。震爲喜笑。動極故過其過。由三之往上使之兌。初過往者艮。初卽過喜。義以相連而及損疾當吉。而四未受益。但得无咎。故傳曰亦可喜。明尙有吉者在也。

六五或益之十朋之龜弗克違元吉

六五元吉。自上祐也。五必易二乃成益卦。二弗損則五亦未見益

矣。三往居上。坤已成。艮五無往來之義。則有若或益之者。古者貨

貝而寶龜。艮有龜象。說見貝形背隆如龜。亦艮象也。詩錫我百朋。

注云五貝曰朋。十朋者五十貝也。五天數十地數五十。又大衍之

數龜直十朋。乃最貴者。龜無所予於人不益而益是神也。非人也。

故或之五。承上有孚。龜筮協從。五上天道。祐乃乾象。天且弗違矣。

違者。避而辭之之意。五體損則於益若辭避者。而益已自上而至。

無心於益而益故卦之元吉在五也

上九弗損益之无咎貞吉利有攸往得臣无家

弗損益之大得志也 上與二同爲弗損益之者二以無所往而弗

損上已有所往亦弗損蓋自三言之則陽損其一自上言之則陽

原本損但見於陰已自益之耳初之合志二之中以爲志至上則

其志大得大其剛而盈也是眞損而有孚者也元已在五故上不

言元但曰无咎是可貞者也故曰貞貞中有元故得元之吉三已

往上故利有攸往三於上爲得友者上於三爲得臣坤三有從王

之義臣道也內卦稱家兌金以坤土爲家三本泰坤之兌爻自上

易而坤象隱且往來有室家之象上已升於艮闕兌脫於三則三

爲無家矣無家者損之奉上於無形者也而上得國爾忘家之臣

夫豈務財用以爲益者哉

三三風雷益君子以見善則遷有過則改 雷風之恒三陽在中乃

風之已入雷之已出者風雷之益三陰中聚是巽之陽方入而散而震之陽欲動而出風自天行雷自地起此非損風以益雷也乃雷之震動固有藉鬱陰之散而因以奮迅者斯真合而有助矣乾元爲善坤迷爲過震內巽外皆爲得位復見天心故見善雷以動之四來初者遷也姤往消陽故有過風以散之初往四者改也初九利用爲大作元吉无咎

元吉无咎下不厚事也彖言兩利初與四分見之卦由兩爻而成四卽攸往之利初卽涉川之利也損初曰已事則益初爲民事矣初在地道益莫大於農功故神農耒耨之利取諸益出震當東作之時震動爲作大作者大興農事陽稱大也合震坤艮巽諸象於全卦乃爲大作而利用獨在初者初爲成卦之主也用者用九也震得乾元故元吉元者大也大作已得無彊之益而或纖悉未盡則咎不免焉故又必要之無咎傳曰下不厚事者坤厚致養厚事

謂厚生之事。力積在下。教稼在上。惟不以是爲下之事。而以是爲上之事。此所以必下於下也。

六二或益之十朋之龜弗克違。永貞吉。王用享于帝。吉。

或益之。自外來也。益二卽損五。故朋龜弗違之象。畧同。益自在初。

二與初無所往來。是亦若或益之也。龜乃艮象。損爲益。則艮象已失。二又在互艮之外。何亦象龜乎。蓋初自外來。由外卦觀二。固卽倒損之艮。以爲益也。弗克違。亦以其不求益而得益也。損五元吉。

而益二永貞吉者。二在臣位。非若損五之居尊。二本否坤之主。坤用其六於四。四仍互坤。是有得於用六之永貞而吉也。乾爲王。震稱帝。艮爲宗廟。長子主鬯。合成享帝之象。用者五與二應。五以中正之王。用二主祭。吉在二。卽在五。故兩言吉也。損益皆言用享。而有不同者。損用二簋。非祭必備物之義。故損曰用享。謂享獻也。公用享于天子之享也。益取益下。使之主祭而百神享之。故益曰享。

于帝。謂享祀也。王用享于岐山之享也。初言農功。二言祀事。聖王先成民而後致力於神也。

六三。益之用凶事。无咎。有孚中行。告公用圭。

益用凶事。固有之也。益三。卽損四。三多凶。四多懼。故損四象疾。益三象凶。說文。凶。象地穿。交陷其中。三當互。坤。伏。坎之中。穿陷之象。凶。謂凶年。凶事。猶云荒政。大宗伯以荒禮哀凶。札是也。凶事。乃益下之最要者。益之者。益坤也。離。燠。爲旱。坎。險。爲水。艮。黔。喙。爲螟。蝗。災。青。伏。坤。田之中也。國用制於歲杪。故言於下卦之終。有備無患。故無咎。其咎之所由無者。天地不交之否。以初四易而震。巽有孚。孚在時中。三處伏。坎之中。而行震之大塗。是謂中行。所行乃王事也。春官典瑞。珍圭以徵守。以卹凶荒。蓋王使人徵諸侯。憂凶荒。則授之以致王命。震。侯。稱公。乾。玉。爲圭。三互坤。又互艮。重土爲圭之義也。執艮手。承巽命。以告於初。是乃三以凶事見用於王者。爻兩

言用皆王用之也。傳曰固有之者反損爲益。賑卹所用本是出其舊有之餘也。

六四中行告公從利用爲依遷國

告公從以益志也。三四俱爲中行以俱在三才之人道也。四與初易有遷國之象。遷在初而言於四者。四爲巽主。將遷國必先有告命。惟四有中德。故告公而公從。坤之巽又本在初而陽下於初。從謂陽之入於陰也。往來之義。先往後來。故遷國者在益下之初。而告公者先在損上之四。坤土爲國。震動爲遷。遷必有所依。國依於民。坤成震乃乾。依於坤。盤庚曰。震動萬民以遷是也。爲字去聲。爲得所依而遷之。此其志乃公之所信。故四與初同其利用也。益道莫難於賑凶。莫不便於遷國。而益之大莫大於此。非行中道何謂時行哉。

九五有孚惠心勿問元吉有孚惠我德

有孚惠心勿問之矣惠我德大得志也。五爲益主其道在損然五
之有孚與損之損而有孚者各異損下難其有孚益下不難於有
孚也須觀其心心不可見見之於所問乾主施巽利稱惠惠出君
心是謂惠心風雷以聲相應有問之象夫問在惠問亦善也然必
因問而惠及則焉得人人而問之卽焉得人人而惠之也互艮止
故勿問傳曰勿問之矣之卽指其所益者五用初大作用二享帝
用三凶事用四遷國固已各得所用而有無待於問者純乎惠心
是所謂有孚惠心勿問者也乾元在五於其不言所利而元見焉
吉之至也五位天德故稱德我以惠爲心人卽以惠爲德四之益
志至此而大得世未有上不孚下而下能孚上者故傳於惠我德
但言得志而不必重言有孚也

上九莫益之或擊之立心勿恆凶

莫益之偏辭也或擊之自外來也

凡爻言益之者損皆謂上益皆

謂下上九處亢與時偕極是不能有益於下者故曰莫益之之指
下卦非謂人無益於上乃上無益於人也莫益與惠心相反故惠
德者亦反而爲爭民施奪震雷將上擊之矣此之字指上而言凡
雷稱擊陽出遇陽象上之擊象亦其義也巽上喪其資斧有擊之
者上與二皆無往來故皆或之夫其所謂莫益者何在也惠心實
於恆久益與恒易上在恒三互乾伏坎者心也恒三不恆其德故
原其在恒而曰立心益上卽損初損初猶能酌損益上莫益故凶
也此爻之傳最爲難明若謂莫益之乃因益卦而言則五亦未嘗
損已者何不云偏且何不曰莫損之而曰莫益之也蓋上卦皆損
上者上進於五盛極而衰則或好大務名上非無損也而惠心不
存上雖有損下不益也故曰偏辭也震之上擊本爲內往乃曰外
來蓋雷從地出而雷之擊物自人視之有若自天而下者出於非
意上處卦外其或擊之者由我莫益之故則其云自外來者亦猶

云自我致之。坤上龍戰。乃在乾初上。每取象於初爻也。

三三澤上於天。夫君子以施祿及下。居德則忌。澤上於天。非若雲上於天也。雲上猶未成雨。謂之澤。則陰之所積者厚。雲已成雨。其決而下者。可必也。坤土在天位之上。土田之錫自天。是謂天祿。乾主施祿。乃施下之名。未施。則不得爲祿矣。五剛在一柔之下。有以次而及者。自上及下。爲祿。自下受上。卽爲德。居德猶言屯膏。居乃居積。施祿之反也。口惠而實不至。將有財聚民散之懼焉。究之所聚之財。不可保。兌壅坎而必潰。是所忌也。壅於上。爲居決於下。爲忌。其在辟卦。季春之月。天子布德行惠。命有司發倉廩。賜貧窮。賑乏絕。開府庫。出幣帛。周天下。取此義也。

初九壯于前趾。往不勝爲咎。

不勝而往。咎也。夬由大壯而長壯。初曰壯於趾。更進一陽。趾加前矣。初乃復之震剛。故壯。但自震而臨而泰而大壯。皆以震進。進及

於五震象已失。變震之陽始爲兌之陰終。壯初以孚四征凶。夫利攸往。初之往。豈宜有咎。然卦自二至上體夫。三至上互夫。初處最下。於決陰有不勝其任者。故象曰往不勝。而傳直曰不勝而往。象曰爲咎。而傳直曰咎。於未往而知其不勝。於未有咎而斷其爲咎。初專於壯。教以其危乃光也。

九二惕號莫夜有戒勿恤

有戎勿恤得中道也。卦利在往。而卦義在厲。利當歸五。而二與之應。故孚號有厲。告自邑不利。卽戎之象。皆屬於二。不言孚號而言惕號者。論卦則五剛以同德相孚。論爻則二與兌隔。未卽孚也。但見其惕以號耳。惕卽厲也。惕乃夕象。故言暮夜內乾伏離而在兌西之下。日沒於西。月生明於西。於日爲沒。暮也。於月爲明。夜也。所以至暮夜而猶惕者。爲柔乘有戎之象。二至上體夫。二又坎爻。故於二言之。坎主憂恤。乾二時舍。故勿恤。惕號專於自治。勿恤謹於

外攘治之密而處之審傳所謂得中道也

九三壯于頄有凶君子夬夬獨行遇雨若濡有愠无咎

君子夬夬終无咎也 三以乾體上下又皆互乾與上應而疾之已甚乾爲首頄間有骨曰頄頄於面居中三在五剛之中故象壯於頄大壯之三小人用壯壯見於面在君子宜有凶矣然但言有凶非必凶也五剛獨三稱君子因其應柔而特表之也三至上又互夬故稱夬夬卽乾三乾乾之義澤上於天雨決而下三承兌應陰故爲遇三之行非獨也行而遇雨則三所獨也雨潤爲濡三未嘗濡也以與上應有若濡者若濡不免生衆陽之疑含怒爲愠初二四五伏兩離怒乃火象以疑致愠愠則將咎之矣三有終義剛長乃終三非不勝而往者夬夬之心終當共白耳

九四臀无膚其行次且牽羊悔亡聞言不信

其行次且位不當也聞言不信聰不明也 四體大壯而四不言壯

亦不言夫。蓋決陰之任在五。震陽身爲兌陰。則不健於行。人身百體運動。而主於坐者惟臀。臀於身爲中。於體爲下。故臀惟初爻。和中二爻。夫四象之而必合於坎之溝瀆隱伏。困初坎體。巽兌墜坎之上下陰爲膚。陽掩其陰。故夫姤皆爲無膚之臀。無膚礙於動作。故其行次且。足將進未進。曰趙趙。乾四無常無恒。夫之當往者在五。非四也。兌爲羊。卽大壯觸藩之羊。在壯猶肆觝觸。至夫則已就牽。牽羊者縱羊使前。而居其後牽用。巽繩四處五後兌乃倒。巽象若反而牽之。次且者行不及羊。然牽羊正合處後。故雖悔可亡。四於夫似和非。非真有得於危厲之光也。夫時號與告。人皆有言。兌墜則失坎耳之聰。已過伏離。故不明。四雖有聞。非能如坎之行。不失信。蓋以位不當。而幸得悔亡。亦以位不當。而獨爲無孚耳。

九五。莧陸夫。夫中行无咎。

中行无咎。中未光也。

剛進至五。柔已垂盡。陰微若莧之在陸。夫爲

三月之卦。覓以三月生。莖葉易見。故字從見。兌現象也。高平曰陸。乾直則平。剛長則高。大陸之地。柔草生焉。五體。夫互。夫故重言之。又獨三五言。夫者三應五比。疑若不能決者。特表其至健。謂之夫。夫以見其決之慎重。合於中道也。五中行而傳曰中未光者。剛長乃終。是必乃終。斯乃光耳。夫利往而五但無咎。未光之歎。在終。非在中也。

上六无號終有凶

无號之凶。終不可長也。上當兌口而象無號者。非謂陰處窮極。無處呼號。亦非謂決陰將盡。無所用號也。上乃乘五剛者。全象之義。繫焉。無號卽孚號惕號之意。凡號必有所向。兌口向外。故疑於無號。決必有遇。將受以姤。倘以一陰忽之。則陰之消者旋長。而剛長不終。若其無號。則終有凶矣。傳曰終不可長。此卽姤傳不可與長之意。三上在內外之終。俱曰有凶。俱恐其不知厲也。

三三天下有風姤后以施命誥四方 風挾火性而橫行天下之風
卽地上之風也顧自地言之則君與民以身相接故省方觀民以
身親而教可設自天言之則君與民不能以身相遇而欲使之周
遍不得不作命以施之姤與夬俱言施兌澤悅物故有施祿之實
異風撓物但爲施命之虛也夬爲書契反夬成姤兌口向下故命
誥取之結繩易爲書契書契在結繩之後而此若因夬及姤者蓋
雖書契未興之世命誥所不能無言命誥而書契之治官察民者
在其中矣姤當五月天子居明堂太廟嚮明而作書以誥四方其
與天地交之泰同稱后者皆以其左右民而親之也

初六繫于金柅貞吉有攸往見凶羸豕孚蹢躅

繫于金柅柔道牽也 初爲卦主故女壯勿用取女之義莫明白易
見於此爻巽繩爲繫柅者尼也用以止物不必有所指名巽木加
乾金堅之至也坤貞在初以繫而不移爲正故吉復得乾元而姤

無坤元者。女已壯故也。凡陰皆不利往。巽眼爲見。夫所謂終有凶者。於此可見。姤初貞吉。而又曰見凶。見其理當凶耳。所繫者豕。值亥純坤之月。而象言於陰之始生者。陰卽是豕。特以旣繫而爲羸豕耳。羸乃羸之謂。卽大壯羸其角。井羸其瓶之羸。或以羸爲小豕。則與女壯義背矣。剛巽柔順爲孚。巽股進退。又象撓動。蹢躅者。動而欲進之貌。剛柔旣孚。卽恐剛不能制。故以蹢躅示警。其吉在女壯。其凶在勿用取女。傳曰柔道牽者。明所以當繫之故。夫之牽羊。陽牽陰也。故悔亡。此柔道之牽。陰牽陽也。故牽則吉。往則凶也。九二包有魚。无咎。不利賓。

包有魚。義不及賓也。二最近初。地爲天所包。故陽有包陰之義。詩曰茅包之。禹貢包匭。皆以包物言也。陰類之衆。莫如魚。魚乃巽象。陽連於上爲身。陰岐於下爲尾。昏義婦女先嫁三月。教以德言容功。教成祭之。牲用魚。魚取其順。女子從夫之義。剝五貫魚。由此一

陰始之二乘初是包有魚矣。從陽得主理正固無咎也。一陰之卦律中繫賓言陰爲主而陽爲賓也。剛以柔牽則柔反入而爲主以陽爲賓於義背矣。夫觀四尚賓陰進至四猶且稱賓奈何始遇而陽遂爲賓乎。象曰不利而傳曰不及者剛以柔遇爲利二失主道故特以姤之時義斷之。知柔之必遇而有以包之義所及也。於其遇而陽自爲賓義所不及也。復二言仁姤二言義復自乾來故以乾二仁行之德望之。姤自坤來故以坤二方義之德勉之也。

九三臀无膚其行次且厲无大咎

其行次且行未牽也。姤三卽夬四皆與陰隔故臀膚次且之象亦同。夬四牽羊蓋心欲制陰而非其任。姤三未與陰遇陰非所有而欲預防之但見其行未見其牽也。乾已變巽咎不免矣。乾三惕厲故咎不能無而亦不在大大謂陽也。

九四包无魚起凶

无魚之凶遠民也。四與初應何以無魚陰進未及於四故陽雖包陰而魚不爲四有非初絕四乃四絕初也其絕於何見之四當乾之震爻震起也震與巽反起則不包矣消長本於天行所貴制之有方豈宜絕之已甚三三四伏離魚與坎水相得而與離火不相能初在民位民可近不可下四自遠其民則是天地不交而萬物不興也初曰見凶四曰起凶其凶同而義各異故於應爻互發之九五以杞包瓜含章有隕自天

九五含章中正也有隕自天志不舍命也五爲乾主剛遇中正五當之矣象爲以杞包瓜者杞卽小雅南山有杞之杞體高而葉大五德剛中似之瓜生五月外延離本而實女子外屬之象地道尚右瓜瓠右繫卦以外爲右杞木高大瓜雖緣而在下爲杞庇蔭有包之象以者五以之也瓜賴杞以成實時當品物咸章陰不得陽無以章也五當坎位水月內光包者包陰含者含陽五惟中正故

順從者有當乎無成有終之義。夫反爲姤一陰自夬之天位而來。有若自天而墮者。夫無瓜象無所指名。故但稱有隕。天運循環。包瓜取其自下而上。有隕溯其自上而下。傳曰志不舍命者。剝爛復反。雖原天命。君子有志不敢以爲無與人事而舍之。此姤之時義之大也。

上九姤其角吝无咎

姤其角上窮吝也。上最遠陰而獨言姤則知柔之遇剛不獨在二矣。上爻爲角。角主觝觸。物所畏見。姤其角遇之窮也。角以高亢取吝。晉上晉角貞吝是也。上以陰遠而不能制。實亦無從制之。其吝特以處上而窮於義。固爲無咎。事權不屬。原非昧於時義也。

澤上於地萃。君子以除戎器戒不虞。坎水流兌水壅水比於地。未嘗不流也。澤壅不行則雖地爲隄防而不啻水之自上於地。止而不去者是固異乎地上有水之爲比且也。澤下土上則依附。

而其勢相臨。土下澤上。則上於地而無可往。是更異乎澤上有地之爲臨。蓋澤之積極於滿盈。而未至於潰決。斯萃之象也。君子見夫羣而不服。爭心將作。因隄防之障水。而思器械之禦戎。兌金巽木。執以艮手爲戎器。巽工來艮門之內。器之除也。謂治爲除。猶之除宮除道。內坤伏離合巽兌。而義兼鼎革也。坤安兌悅。曾非戎事之時。坤文兌教。亦無卽戎之理。而君子必除器者。惟恐事出於不虞。告戒取諸兌。巽器不徒備。又以警惕坤衆於平時也。

初六有孚不終。乃亂乃萃。若號一握爲笑。勿恤往无咎。

乃亂乃萃。其志亂也。初與四應順以悅。故有孚。然萃有位者在五。

四位不當。則初之志不能無疑。初志在五。故不終於四。四互艮成終。而初在艮下。與比初之有孚。盈缶異矣。羣陰得四乃萃。初欲舍四。是亂乃萃矣。坤迷爲亂。乃字指初。乃亂乃萃。猶云自亂其萃耳。初當坤巽。四亦互巽。巽風相呼爲號。若號則相通以言。雖亂於前。

仍萃於後艮手象握一握者合兩爲一而孚也異命出於兌悅之
口艮倒震爲笑言由四視初則倒艮也四來握則初可往握手道
故破涕爲笑卦利攸往惟以巽疑成恤恤爲亂根艮止故勿恤無
二心而聚以正故無咎傳言其志亂者由孚而亂亂而仍往中間
多此一亂耳

六二引吉无咎孚乃利用禴

引吉无咎中未變也萃由兩陽二雖應五以柔居下未能遽孚四
在高位二四同功有引與同列之義艮手下及於二巽繩上及於
五乃引之象爻之吉獨一與四卽參言大牲之吉順命故無咎也
引與五孚卽爲五所用互艮體咸祭祀之象因假廟之文言也離
爻值夏周禮注詩毛傳及爾雅皆謂夏祭曰禴鬼神享於克誠故
利用謂之曰孚乃利者五猶匪孚何遂利用此四所不容已於引
者也傳曰中未變者二應五初應四二與初皆於卦無往來皆未

變也。而初不若二之中未變也。

六三萃如嗟如无攸利往无咎小吝。

往无咎上巽也。爻獨初三五言萃五爲萃主初應四三承四皆於四不能無疑三萃五而疑四猶之初之亂乃萃也巽爲倒兌嗟於口不聞於人異乎初之若號也故皆謂之如三來自小過之五於卦所謂利見利往者兩皆無之故無攸利然三五互巽四五兩陽終必入而散之故與初皆曰往無咎惟往而後爲萃也傳言上巽者三在小過二四之互巽在下也五易三則巽進而上言上巽明所貴不在應上六也往雖無咎然無攸往之利則已吝矣特以其無咎而小之耳。

九四大吉无咎

大吉无咎位不當也。卦義在順而誕保受命非乾剛不能有爲故彖於人曰大人於物曰大牲大謂陽也四自觀上來居大臣之位。

故以用大牲之吉歸之而繫曰大吉。但四固臣位。非若五之萃有位也。非其位宜有咎矣。而四能率衆陰以利見九五之大人。同其利往。惟有是陽德之大。此所以位不當而獨能無咎。其咎以大而無也。霍氏之禍。萌於驂乘。其昧於萃四之義哉。

九五萃有位无咎匪孚元永貞悔亡

萃有位志未光也。凡五皆君。何獨萃有位也。萃有位爲萃之位不當者言也。五自小過上往與四同德。萃由四而爲萃主者必五。議禮制度考文。惟五當其位。故無咎。四爲五用。是必四先與衆孚。乃四則亂於初。嗟於三。凡於四未孚者。卽其未孚於五。故曰匪孚。匪孚豈得無悔。亨肇於元而極於貞。聚固以正。尤在永貞。如是則乾坤德合而悔可亡。傳曰志未光者。乾之亨大明。坤之亨光大。五有位而更勉以脩德。凡以四故也。元永貞同於比。比惟一陽。故顯萃以二陽。故未光也。

上六齋咨涕洟无咎

齋咨涕洟未安上也。上自觀四往居卦外此猶失位之臣心闕家國由觀互艮手之中易居兌口之缺其象齋咨易如大耋之嗟則嗟若與三之嗟如俱作嗟而此作齋者蓋猶拭淚之拭拭涕之拭來自艮手故也。自目曰涕自鼻曰洟。巽眼艮鼻當兌缺而兌澤出焉也。易之六爻皆無咎者獨萃一卦初號三嗟二曰孚乃五曰匪孚萃由四而四位不當上在無位之上爻猶咨嘆而心不遑安凡皆有疑懼焉懼以終始於他卦獨為善補過也。

䷁地中生木升君子以順德積小以高大。坤下巽上為觀巽下

坤上為升地可觀者莫可觀於木此木之已成者榮落示人以可觀也。地中之木人不得見故特指其生生之理而謂之升木之生由柔而剛巽為柔木在地道之下震為剛木出地道而上初陰為本二三之陽為幹四五為枝葉上為末動以震雷滋以兌澤此木

升之全象也。巽得坤初之順。君子法升以脩德。坤初積善德。積自小小。謂陰也不睹不聞之地也。木先高而後大。巽爲高。坤以大終。順而長之。以成日新之盛德。是故君子無所不用其極。

初六。允升大吉。

允升大吉。上合志也。初在臨體。兌落實取材之時。易成巽而結根於地道之下。上承兌澤。生機發焉。巽爲長爲高。升之象也。初猶未升。而陽氣已入於初。陰得陽則其動也開。且自臨與三易。三之震行。從初以出。故不待至三無疑。而在初已自可信。土主信。信則勿恤。故象爲允升。初得坤元。其吉亦大。傳曰。上合志。上指三言象。所謂志行者。惟二有合於三之震行也。初二同在地道。故初言允。二言孚。三由臨初出地。而其升可見。若上卦三陰。則又已升之象。五在震終。乃稱得志。可見志在於三也。

九二。孚乃利用禴。无咎。

九二之孚有喜也。一來自小過之震而得中。三之震行實資相濟。與初近比。又於巽入最親。上孚於三。下孚於初。孚即傳所謂應也。反萃爲升。萃五匪孚。而升二孚者。萃由四成。故孚五必先孚四。若升則羣陰皆志上行。二以中孚於三。而衆自協從矣。又與萃二同利用禴者。萃二有待於四之引。升二則已爲大人。故萃二之用乃用大牲之用。二爲用於人也。升二之用乃用見大人之用。人用其道於二也。卦象南征南當夏祭。艮爲宗廟。小過內卦本艮。二由震長子來入廟中。其利用由於孚也。但無咎而不得吉者。吉在見大人之人。大人無所謂吉也。萃二先無咎而後孚。升二先孚而後無咎。萃二孚五升二孚三用不同也。其云孚乃利用。若於孚有難詞。兌之附決。非能自決者。有喜遜於有慶。稱其兌悅。又以見二不如三之徑行也。

九三升虛邑

升虛邑无所疑也。三由臨初上往故與二同德而二獨言升其象
虛邑者自三以上皆坤。坤土爲邑。坤耦爲虛。虛邑者無人之地。何
所取諸。蓋南征之吉在三而離象取諸卦外。此虛邑也。離外實中
虛。三在巽坤之交。由東南訖西南而南征乃在巽坤之虛處。此升
虛邑也。巽主疑。其究爲健。三互震以升。故傳曰無所疑。初之九二
之孚。特言信以別於疑。至無所疑而信亦不必言矣。是卽象所謂
勿恤者也。

六四王用亨于岐山吉无咎

王用亨于岐山順事也。四來自小過之二自下而上宜當爲升。乃
四與二俱不言升者。升道在巽而二處巽體之中。升用在震而四
處互震之中。木之升蟠根在下。敷榮在上。惟處中者其升象不顯。
故二言輪四言享。所以交於神明。義與見大人爲近。而不及征行。
帝出震故言王。王無專指。謂五謂二皆非也。四由小過之艮山以

往岐山卽西山兌象也岐在周西南坤象也爾雅以路二達者爲岐旁則山之名岐應亦二達之義四與兩剛合體互兌而位於西故象岐山祭山曰廢懸巽在坤下埋坤土也坤在巽上懸巽木也升至外卦而志行卽已得南征之吉且兼有二之無咎矣傳言順事者四當巽爻與初同德內卦之初但有其志外卦之初已有其事天與人歸順之至也二之用輪不言事者二云乎乃是其事猶有待也

六五貞吉升階

貞吉升階大得志也卦德元亨亨無不利故於二言利五爲坤主貞德見焉元極於貞吉何如也五當互震之終升之極矣卦有兩陽誼同賓主坤陰比列有若左右階之兩分震爲足巽爲高足動於高拾級而進離爻主禮巽順而揖讓之禮行焉陽氣以時而升治象所謂允升於大猷也傳曰大得志大柔之以剛升也

上六冥升利而不息之居

冥升在上消不富也。五已得志上無可升南征取離日之明而上得坤兌日已昃矣非若三互兌而更互震以東出也伏坎爲月上當月盡其象爲冥然上固升體升不來也故冥而仍升坤貞之在五者恐其息於上也冥而不升則不能永其貞而貞息矣貞中有元不息者乾之行健是以大終也傳言消不富者陰虛不富消卽息也而變文言之蓋字義消與息反息訓進長學問之道苟自見爲進長則止矣故生息之息又爲止息之息柔以時升而極於上木之柔者已成堅剛則富矣木旣成又將消落無有常升者木落先見於枝葉陰在上之象然起元者貞也消者不長而息者可續生息之理卽寓於止息之時能不息則雖消不消生之理未嘗絕而人不可得而見是正冥升之象富者有時而消而貞不可消故利也

三澤无水困君子以致命遂志 兌不能困震艮震動艮止非若坎之陽自陷也坎不困於巽離巽入離麗非若兌之陰外蔽也推之坎於震艮兌於巽離其義可知若夫坎兌爲節而兌坎爲困者節水加於澤其流者自流困澤在水上水爲澤壅而不行此非坎水自漏也兌以土積而剋水也民非水火不生活而統萬類以觀則火之生物乃隱於物之身中而自外以生之者獨以不得水生澤無水之所以爲困也然無水乃澤之在地者耳而水之生於天一者終古而不絕君子以爲天有命焉人有志焉互巽爲命互離爲志命不可知而志可自主坎陷巽入命所以致雖困必貞也兌悅離明志所以遂雖困得亨也

初六臀困于株木入于幽谷三歲不覿

入于幽谷幽不明也 他爻俱不言困之所在而初獨言臀懷土卽取困之由也坎爲溝瀆隱伏在下象臀古坐若跪然臀着足而依

於地坎木多心兌金拆之凡木皆以株計二在地道之上上下比陰獨木無偶故稱株木木礙其坐雖坐亦困矣不坐則行行必有所入水注谿曰谷兌注坎也初在互離之下日所不照是爲幽谷初在否坤巽爻主入離日觀之謂人觀初也離日積而成歲初在坎畜歷離三爻人欲與初觀面不可得然其入乃初之自入後世有閉土室卧巖穴者入幽谷象也傳以不明釋幽謂其心跡不欲自明雖失乎中而要自有其所以也

九二困于酒食朱紱方來利用亨祀征凶无咎

困于酒食中有慶也 二爲坎主坎水爲酒離腹爲食既食其祿又加章服焉否坤爲裳互巽爲股詩曰赤芾在股王藻注謂元端服之鞞象裳色天子諸侯朱裳朱鞞朱紱乃天子賜大夫之服二來自否坎之赤來自乾之大赤故曰方來惟責任之重困乃見焉古者賜爵祿必於太廟示不敢專也禮莫重於祭二德剛中則能內

盡於已而外順於道。來自乾之艮。艮爲宗廟。坎爲鬼神。故象享祀。二旣利用而爲困者。其困蓋以征而見坎水性動。故征困至上。乃征吉。一方陷坎。征必凶矣。然二之征乃忘已之困。而欲以濟天下之困。故雖凶無咎。傳曰。中有慶者。此乃孝孫有慶之慶。蓋祭者澤之大者也。大澤必及於下。故於其困於酒食。卽以有慶予之。二惟得中。所以異乎北斗不可挹酒漿。而赤帶不稱其服者也。

六三困于石。據于蒺藜。入于其宮。不見其妻。凶。

據于蒺藜。乘剛也。入于其宮。不見其妻。不祥也。三與初皆困二者。而皆見困於二。然初無凶也。三乘二。其象乃凶。二在否乾。艮爻爲石。易坎則爲叢棘而堅多心。又象蒺藜。上乘爲據。凡乘剛皆危。然乘石未卽危殆。至據蒺藜。則自生矜棘矣。三不知危而自取其困。故傳不言石。但言蒺藜也。互離象宮。三旣辱且危。將返其宮矣。互巽爲入。三與上應兌女。稱妻坎陽卦。不言夫。而但言妻者。陰爻不

成其爲夫也。上自否與二、易三雖相應，妻不在官矣。離目爲見，坎傷離，故不見。六爻中惟三爲困而失所者，故繫辭兩言非所，而象傳曰不祥，不祥所以致凶，非以不祥釋凶也。

九四來徐徐，困于金車，吝，有終。

來徐徐，志在下也，雖不當位，有與也。自九居二而卦中之剛皆爲柔揜，四與二同功，四欲來下於二，與其濟困，而其來徐徐者，卦惟四五兩陽相比，四乘五，因五之徐，而四又加徐焉。困通在坎，外坎爲四所壅，其行故遲也。乾爲金，坎爲車，巾車所掌，天子之玉路，金路皆以金飾，二之車宜爲五所乘，乃四欲從二，轉似爲車所阻，其致困以徐徐之故，此吝道也。然四之徐徐，由其有與於五，五爲大人，四輔五以應二，則四雖不當中位而相與有成，徐徐者無初有終矣。四在否互艮，艮成終也。

九五劓刖，困于赤紱，乃徐有說，利用祭祀。

剗刑志未得也。乃徐有說以中直也。利用祭祀受福也。二四兩剛之在否也。二本艮爻爲鼻。四本震爻爲足。自二上易而兌。秋主刑。又爲毀折。二四互離爲兵。鼻不在乾首而在地道。豈非剗乎。四當巽股之中。二在拇趾之上。足刑及於拇趾。豈非刑乎。此由五爲陰。揜二四君子蔽於小人不得耳。目股肱之用鼻爲面。王儀不肅於上也。足主行動。令不行於下也。備員失職與剗刑者無殊。亦猶蒙言桎梏耳。五在巽股之上。其象赤紱。二朱而五赤者。二分乾赤之一體。不如五之大赤。五自有之也。五無輔而但擁虛位。其困卽在赤紱傳。是以曰志未得也。然五實剛中。困道在貞。貞不妄動。互巽順以處之。因困而徐。故曰乃徐。四以徐致困。五以困乃徐。五徐得中。非若四之後時也。兌主悅而悅由中出其動也。直直猶伸也。五以中直乘四應二。陽剛之志無不伸而相合有悅矣。五上天道上爲宗廟。祭則受福。五受天之福而天下皆受五之福。兌澤施而坎

雨足故利用也。五與二俱言祀事。君明其義。臣敬其事。祭祀享三者。有祭天神。祀地示。享人鬼之分。二主酒食。自與享義爲近。五在天道。自及天神耳。

上六困于葛藟。于臲臲。曰動悔。有悔。征吉。

困于葛藟。未當也。動悔。有悔。吉行也。上由否坤之地道。而中歷互巽之木。其象若草之蔓延者。葛藟是已。葛徵貢於澤。農藟似葛而大。上惟一陰。而象葛。又象藟者。陰數耦。其岐出在上。似之。葛藟乃利慾牽纏之象。臲臲。文皆從危。葛藟。鼎於樛木。於巽爲長。爲高。坎矯輮於下。巽撓亂於上。兌秋之終。生意盡矣。傳曰。未當者。得所則當。失所則不當。不仁而在高位。所以危也。困極將變。兌口爲言。困時言不爲人信。宜以尙口爲戒。而默悔於心。曰動悔者。心與口相度之辭。動卽尙口之謂也。動輒得悔者。動以防悔。乃無窮也。有悔而征者。悔以制動。非爲尙也。兌處陰終。當返乎震之陽。始動。征皆

震象震無咎者存乎悔。又以勉君子使之向吉而行也。

三三木上有水井。君子以勞民勸相。井取木上有水。凡數說有謂

水氣上行直能達於木末而汲井養人者象之也。有謂古以木爲瓶如樽罍古皆用木故木入而水出也。有謂古者掘地及泉以木實其底搆其旁則汲不至濁而泉出亦無窒塞也。是皆不如鄭氏桔槔之舊說爲確。不可易。至若困節俱兼兌坎而不爲井者節無巽入之義瓶無繩繫無以利用困則兌在坎上兌濁坎清上濁而巽入不已則土克水而無水井乃清常在上濁常在下而巽成上水之功故困窮而通井通而不窮也。萬物莫不資水以生而鑿井汲泉乃由人力君子法巽之命用坎之勞勞在民而勞之者在君子之先勞相勸者在民而勸相者在君子之董勸蓋又以巽命之卦爲主上水之功在五而巽乎水者在初互兌則勸於口而民悅於使耳離則明於心而雖勞不怨所謂養而不窮者其義至廣或

專指井田似於水上有水之象未合也

初六井泥不食舊井无禽

井泥不食下也舊井无禽時舍也全卦共成一井六爻又各自爲

井初在兌下土承濁水淤而爲泥以其井體故曰井泥傳特言下

對上之元吉在上而言兌口爲食初未入互兌而巽象倒兌故不

食不食爲泥之故然非所論於舊也初與五易五升成坎初乃坎

五舊時所居之位是爲舊井此井泥者豈自舊已然哉巽陰爲禽

凡可爲人擒制之物皆是他卦失前禽田無禽以獸爲禽也此言

禽者川禽也國語取名魚登川禽韋昭注以爲蟹蜃之屬泰乾伏

離既易則爲蟹爲蜃之象不顯是無禽也禽原不當生於井中言

舊時之無禽正以見此時之不能無禽何以見之以其爲二之鮒

故也禽因泥而有故又溯其舊而傳傷其時曰下曰時舍同於文

言傳釋乾初二之兩爻蓋井由泰易下自勿用況又居陰升五居

尊功成井養凡以美五之剛中故陰雖變舊猶追思其乾德也

九二井谷射鮒甕敝漏

井谷射鮒无與也

陰虛爲井陽實爲泉二之剛中非無泉也水注

谿曰谷溪澗之間有井坎水注澤澤下有泥是謂井谷水清無魚濁乃有魚鮒卽初六之禽陰小而坤衆也射乃採取之訓春秋矢魚于棠臧僖伯曰君不射射固有取義也巽陽入於陰故初爲二所射但井雖有鮒猶可汲也兌有甕象泰乾缺其下初之井爲舊井者二之甕亦爲敝甕巽穴開於甕底不但敝而且漏矣五在泰本與二比自初往居五而二失所與象鮒象漏皆由此故象甕瓶之象獨二有之故傳言無與以明二之窮在人不在井也

九三井渫不食爲我心恻可用汲王明並受其福

井渫不食行側也求王明受福也寒泉之象至五乃見初泥二谷水已淺矣三則井水與泥盡去之而爲渫凡治井者必先涸其水

三處兌中而當人位巽又爲工以人工去穢濁其象井渫井方渫水未至也無水自無可食三在泰互震爲塗爲行而坎剛亦從乾之震爻以往象若行道之人坎憂爲惻我者三自謂也行人見井渫而爲三惻之若曰渫後泉至必可汲而食之凡用坎巽之絀用離兌之瓶皆用也五爲卦主稱王互離故明福者乾象天子以建子之月命有司祈祀於井泉爲民祈福也並受者任賢則福在君施惠則福在民王之不明豈足福哉蓋皆行者爲三心惻其心口相度之詞如此三以陽剛未見用而世自有爲之求者求在惻不在渫也

六四井甃无咎

井甃无咎脩井也四在渫後未及於五寒泉猶未至也儲水之利在甃以瓦甃壘井也互兌當秋古禮浚井改水行於立秋井之穢濁已去正當脩整三陰之中四當人道有脩之義四上下皆陽取

離火所燒坤土之器用巽工入於井以壘井四旁自下達上井發象也陰無泉宜有咎矣然發時本不可有泉故無咎初二在地道未渫未發者也三渫初之泥四發一之谷皆關人力至五寒泉乃得天焉

九五井冽寒泉食

寒泉之食中正也剛中者五也既渫既發汲於瓶而承兌口充離腹此真上水而養人者五自乾升得位中正而泉見焉以體之潔兼味之甘謂之井冽乾爲寒稱寒泉泰已成井初居姤位陰生於午井水先寒也井以食爲養五無爲而自有不窮之養此所謂無喪無得往來井井者也二五皆剛中而二傳曰無與五之中正四發上收卽所謂與也

上六井收勿幕有孚元吉

元吉在上大成也井至上而巽水上水之義昭然矣汲井在繙與

瓶收者。輓轆收繙也。水未至則收而引之。水既至則收而置之。汲以收終。養以收始。上當坎上所見。惟水故。象井收幕者。覆也。周禮掌帷幕。幄帟綬之事者。其官曰幕人。其事謂之張事。張亦覆義。蓋帷施於旁。其用少。幕覆於上。其用多。井收當幕而後汲者。踵至故戒使勿幕。上在離外。爾雅曰。幕幕也。井至於幕則幕之矣。陽實象幕而陰虛不幕。凡以見養之不窮也。坎以心亨有孚成井之功在五。而功之大至上。乃備故五得乾元而有孚之吉。言於上。易稱元吉在上者。獨履與井履下體兌乃陰之終。井下體巽乃陰之始。履傳曰。大有慶。井傳曰。大成是非。乾元之大何能慶成於上哉。

觀象居易傳箋卷第七

觀象居易傳箋卷第八

三三澤中有火革。君子以治歷明時。革與睽異者，動而上下，不過相離，聚而相息，必不相得，亦與既濟異者，水在火上，則水藉用於火，而其通乃神。澤中有火，則火無畏於澤，而其勢相敵，以澤火卦象觀之，離互巽爲木，爲風，火附木而風揚火，自火言之，則火勝兌互乾爲水，爲寒，水生於水而寒於水，自澤言之，則澤勝且也大澤之內陰火潛燃，朱熹夜動是澤中原有火象，其光燄不定，亦不久而易之革象之。君子見夫革道之大，莫如天地革而四時成，則歷爲天地之大紀矣。歷法以日躔爲準，而占星者必於夜離在地道兌當酉位，星由此見焉。白虎通曰：星者精也，據日節言也，是仍以日爲主也。因四時有變革，而歷由此治。東作西成，治歷又以明時也。古無一日分十二時之說，晝則觀日，日出而作，日入而息，是也。夜則觀星，三星在戶，月離於畢，是也。星爲金之散氣，兌屬金，故先

儒謂兌爲星兌決所以爲治離明所以爲明但天有歲差自唐堯
至於今冬至之度由虛女牛斗箕凡四千一百餘年而所差凡五
十九度其或遲或速參差不齊古人所立差法俱但可合於一時
而不可通於千古故隋劉昭謂不差不改不驗不用宋何承天謂
當順天以求合非爲合以驗天可謂要言不煩矣傳不稱先王而
稱君子歷雖創自先王而明理之儒與夫專門之家精算之士後
之君子何代無之也

初九輦用黃牛之革

輦用黃牛不可以有爲也初來自遯上離兌二女之不相得者有
互乾在中而初無與焉與上相易而不相應初雖欲有爲而上不
之信二爲卦主二則猶是遯二也二在遯象黃牛之革在革則離
爲牛黃離之位爲黃初所居遯之艮位而來自遯乾之艮爻艮象
皮革以革束物曰輦近承於二二本革也初又加革焉束以異繩

革之象也。用者初用二也。傳曰不可以有爲明二可有爲而初則不可。此不革之革也。

六二己日乃革之。征吉无咎。

己日革之行有嘉也。二爲離主。象所謂文明者也。離火之中有土。故彖己日之義屬於二。不言孚者。孚在革之前也。之指兌言。曰乃革者。二於革之道有當矣。於革之時猶未也。未及改命。故有事於征。二在大壯震體。主行。卦之有孚。在五乾三爻二處。乾下但以征爲吉耳。然吉非傳之所謂有嘉也。征在革前。嘉在革後。易於二多以貞爲吉。以征爲凶。若頃損困三卦是也。征吉者獨有此一爻。非以革之時乎。革非在下之事。若使德不及二。咎必歸之。故又言無咎。凡爻言嘉。若隨之孚。嘉離之有嘉。遯之嘉。遯多屬五上之剛。革二獨以柔在下。而有剛之用。論其心宜得隨遯之吉。論其事并合離之無咎。既革之則上下皆有嘉德而無違心矣。或曰歷元商用。

命辰周用丁巳巳日乃辰巳之巳革之謂革商也然古無以命子紀年者且謂文王繫辭已有革商之意其與論詩前商何異哉

九三征凶貞厲革言三就有孚

革言三就又何之矣 二已征吉而三又征凶何也卦用離之坤不用離之乾乾道乃革在四之時三非其時離終燄動而遇澤故凶也卦獨三四無所往來貞德自具能有乾三之惕厲就者從也火寄諸緣乃就之象從二爲就三就指互乾三爻火發聲爲言其言謂四五亦當從二也乾兌之金皆畏離火夏秋之交金必三伏此其義矣三孚於未革之前四孚於方革之時五孚於既革之後革道乃成而三之孚則由革言三就而有之也有孚者孚於兌陰也傳曰何之之者往也就者來也三乾俱當就二而三又何往乎

九四悔亡有孚改命吉

改命之吉信志也 四當互乾伏離之中而在乾道乃革之位故於

革爲正象。由文明以悅大亨以正而悔亡也。有孚者。己日乃孚也。乾互巽爲天命。旣革曰改。離改而兌也。順天應人故吉。象先孚而後悔亡。爻先悔亡而後孚者。革與悔相倚。乃孚者。猶未見其悔之必亡。有孚者。則惟覺其革之至當。蓋二所謂己日者。乃此伏離之日也。傳曰信志。信卽革而信之之信。志卽志不相得之志。信志則不相得者得矣。

九五大人虎變未占有孚

大人虎變其文炳也。革道在四。未當湯武之位。至五乃稱大人。不曰龍飛而曰虎變者。龍飛乃乾道之常。虎變則乾道之變。龍陽虎陰在陰卦故稱虎。兌爲虎。履稱履虎是也。革乃治皮去毛之名。黃牛之革。毛已去者也。變者。兌秋之時。希革而毛毳。革道旣成。則考禮定樂。有文章之事焉。故不曰革而曰變。五自大壯上自遯。五柔變剛。上剛變柔。故皆曰變。虎之文大而踈朗。乾道大明。伏離文明。

是謂文炳。不文則不當矣。象其文章。非象其威武也。改革大事。必謀及卜筮。因變而言占。未占有孚。豈不占哉。巽風從虎。其孚在未占之前。所謂革而信之也。彖於蒙比言筮。爻於革言占。比之建國。革之改命。皆非聖人不足任其事。蒙亦聖功也。

上六。君子豹變。小人革面。征凶。居貞吉。

君子豹變。其文蔚也。小人革面。順以從君也。上兼君子小人言者。水上合而成澤。土生乾金。君子也。水克離火。小人也。上當兌陰。小於虎而爲豹。天文。尾火虎箕水豹。同在析木。而陰陽判焉。楊子曰。豹變則虎。豹固不如虎也。上自遯變。豹亦兌象。蔚則兌陰。潤澤之象。蔚遜於炳。炳如日月之麗天。蔚如草木之麗土也。革面如北面之面。乾首爲面。小人至此。兌口喁喁向化。上居卦外。而內向也。傳曰。順以從君者。乾五爲君。上自初往。相從而處。其後順之至也。卦終將變。征者動也。火動而上。澤動而下。動則已。革者又將乖睽。

故凶兌陰本得坤貞不征則居以致吉戒其征所以亡其悔也

三三木上有火鼎君子以正位凝命木者薪也火者薪之火也人見薪在鼎之下而不知火固在鼎之中故言木上而烹飪之義可見焉鼎大且重有位之象鼎有實有命之象鼎不正則有覆餗之虞位不正則失聰明之用離爲南而嚮明之位正其位所以凝其所受之命也巽爲命令命卽理也離互兌現以正於外巽互乾健以凝於內隨其所在各當天理立命定命聚而承之自天子至於庶人一也

初六鼎顛趾利出否得妾以其子无咎

鼎顛趾未悖也利出否以從貴也鼎初顛趾出否之義自來解者未明蓋革物者莫若鼎故於初爻發去故取新之意鼎以象言革之象亦儼然一鼎而其趾向上連體大過大過顛也反革爲鼎否已出矣否卽去故之故革兌現上互巽入下兌澤下漏而離爲乾

卦至鼎則初爻爲趾已著於地以其自革反易反復皆謂之顛鼎之顛趾其趾以顛而得正也古鼎三足皆空濁澤皆歸足中所謂鬲也顛趾出否本皆在革而利歸於鼎否者一陽亦乾一陰亦坤大壯初陽上陰往來有否之象傳言悖者反也於象爲顛者於義爲悖而因顛以出否有利固未爲悖也女主中饋巽宜爲妻而初陰來自大壯兼畫之兌且陰在上當坤之兌爻兌固妾也與上易稱得雖易而非應奔則爲妾初所得者非妻也其妾也震爲主器之子上自震爻而往兌澤生震木初之所易卽妾之所生得妾未足云利妾主中饋且當取咎而利以其子則母因子貴咎卽以利而無傳曰以從貴否與貴皆指妾言也

九二鼎有實我仇有疾不我能卽吉

鼎有實慎所之也我仇有疾終无尤也鼎以陽爲實否旣出則可置實於鼎二自遯來實至二而始有但有實在下未能若三四之

在高位。三耳革。四折足。互兌容悅。德不足而疑忌生。於二有人朝。見疾者。易以巽爲疾病。惟此作冒疾之疾。蓋病從風生。而人之見嫉於人。亦如風之中人。而不及覺。是亦巽象也。然曰有疾。則亦有不疾者。三吉四凶。固當不同。故傳曰慎所之之者。往也。三陽同類。稱仇。仇兼仇。偶仇。讐兩義。人非聚處。則怨忌何自生乎。二有實。五亦中。以爲實。二雖見疾於同官。而二五自必相合。我者。二自謂也。上承互兌。人似有欲。卽我者。惟本乾惕以慎所往。則與兌別體。疾我者。究無由而卽。此所以遠小人也。傳以無由釋吉。尤謂人以過歸之。詩言許人尤之。無我有尤。是也。尤與應相反。二見疾。卽五不能無疑。故必要其終。其始尤者。其終應也。

九三鼎耳革。其行塞。雉膏不食。方雨虧悔。終吉。

鼎耳革。失其義也。鼎以耳行。鼎旣實。則以鉉貫耳。而扛近食前。鼎之行。所以爲食也。鼎三卽革。四革以四爲正象。故旣易爲鼎。而革

義存焉。五爲鼎耳。互兌毀之。故耳革。行亦指五。五柔進上行。而三當兌連巽。又不果。故其行塞。離爲雉。兌澤爲膏。內則所謂雉羹也。三當鼎腹。膏之所貯。巽倒兌。故不食。然食不食在人。而可食者在巳。三處乾中。陽必得陰。乃雨中。爻互夬。澤上於天。有方雨之象。方雨猶未成雨。豈得無悔。但方雨則固巳雨矣。悔亦從此而虧。巽斷兌。缺悔以漸至亡。更極於無而終吉矣。傳曰失其義者。鼎與革反言。鼎又言革。則鼎義已失。故革四悔亡。而鼎三僅爲虧悔。其吉亦必要於終也。

九四鼎折足。覆公餗。其形渥凶。

覆公餗。信如何也。鼎實至四而盈。四在大壯。體震爲足。在遯亦當震。爻震成離。則火克乾金。且四在兩卦之交。三陽相連。而四值中斷。足以兌而折。餗指鼎實。周禮醢人糝食。注以糝爲菜餗。是也。鼎三足。象三公。四最近君。故稱公餗。然而公餗非否也。鼎顛則盡傾。

覆雖傾而未盡。餽已離鼎。故言其形。形卽鼎象之象。渥者沾濡之貌。兌澤連於伏坎。遍沾鼎體。在人則所謂汚朝之臣也。鼎獨四爲凶。蓋無實者可以顛。而有實者不可以覆。傳曰。信如何者。承革卦言革四信志。而鼎四之信。竟如何哉。鼎蓋以食人爲信也。

六五鼎黃耳金鉉利貞

鼎黃耳。中以爲實也。五以中虛爲鼎耳。離得地之中氣。其象黃耳。猶之黃裳黃金也。鼎貴實。而耳取其虛。非虛中則不能舉之。以行其實。傳曰。中以爲實者。五自遯與二易。二五皆得中。故能以二之實爲實耳者。陰耦分列之象。黃則其聰明之德也。鼎不自行。實鼎耳者有鉉。鉉卽扃也。音義並同。儀禮設扃鼎是也。上在鼎上爲鉉。鉉爲耳而設。故上之象見於五。上本大壯之乾金。金鉉者。鉉用木而以金飾之。金以黃爲貴。五上同德。金與黃互文也。離火乃克金者。用六利永貞。此金鉉所以必爲玉鉉。而卦之元吉不在五而在

上也。

上九鼎玉鉉大吉无不利。

玉鉉在上剛柔節也。五鉉爲金而上又爲玉者古之鼎局天子飾玉公侯飾金金玉皆乾象卦義重在養賢五以中應二養賢之禮非必盡享於庭則用公侯飾金之鉉已爲大烹若上則當上帝之爰享帝乃天子之事非用玉鉉不可也上從五之利貞而來坤惟大終故大吉而天人之享無所不利傳曰剛柔節者止而不過之謂節五柔以剛節之故用金上剛以柔節之故用玉苟非玉鉉則但見應剛之亨而不見得中之吉矣是則五之義重在耳上之義重在鉉金鉉但以表虛中之能受玉鉉乃以見貞德之有成玉溫潤而燒之不熱鼎全體皆金而善其用者在玉也。

三三游雷震君子以恐懼脩省卦獨雷與水言游者明之兩作山之兼澤之麗象雖重複未嘗不截然有分風之隨亦稍息而復起。

惟雷與水之至。象雖相繼。其來迅疾。先未終而後已始。故俱言洊。而水與雷之洊。又有不同。水惟就下。遇有阻礙。亦或遲緩而紆迴。故必言所至。而不可曰洊水也。雷惟上山。觸發於空。雖不一聲。而實一氣。其至莫得其所在。故雷不必曰雷洊至也。君子觀夫重震則中。互艮坎。恐懼在心。坎憂於心。而獨惴惴也。脩省在身。艮返於身。而常惺惺也。恐在懼前。省在脩後。恐而懼。脩而省。亦洊雷之象。雷有收聲之時。而君子之恐懼脩省。無已時也。

初九震來虩虩。後笑言啞啞。吉。

震來虩虩。恐致福也。笑言啞啞。後有則也。雷從地起。故以初爲卦主。而詞與彖同。獨言後者。後對初而言。震之初來。但覺虩然恐懼耳。震又加震。乃互艮坎。而笑言始雜。在初則心未忘恐。其啞啞者。雖可必於後。而天則所在。亦卽其先。而可信其無失也。來者陽自乾來。非以之內爲來也。虩虩啞啞。震之重也。而言於初者。雷之發。

聲有大小疾徐而無停隔間斷故雖始出而其聲不可次其先後也。福與則皆乾象。福謂天爵天祿則謂天道天理致自我致之有亦固有之。既能以危爲安又不以忽忘敬其吉卽象所謂亨也。

六二震來厲億喪貝躋于九陵勿逐七日得

震來厲乘剛也。二五於兩剛皆其至邇者故二曰震來五曰往來而其道皆在厲。雷初發之勢甚盛二迫於初不特心兢兢也。更加厲焉人驚恐則多喪失。二互艮手而遇坎陷有喪之象。貝者羸屬離爲羸也。十萬曰億萬萬亦曰億坤爲衆衆至億而極震體本坤內坤伏離震來則離象隱坤喪朋於東北故曰億喪貝。艮山爲陵二三四積數得九故曰九陵震足起艮山之下爲躋重震其象相逐艮止故勿逐卦義不喪七也喪貝似非能守者然二雖勿逐而躋陵者必至於陵震有復象七日來復者三四合而成七也。艮亦象貝躋及艮剛則仍得矣。二以乘剛而懼故喪亦以乘剛而往故

得二當臨位。臨二體復。七日之得。乃以休復而感臨也。

六三震蘇蘇震行尤貴

震蘇蘇位不當也。三田地道位當。泰月。蟄蟲始振而昭蘇。故曰蘇。蘇。夫雷出地而蟄蟲咸動。乃在大壯之月。此時猶未啟戶而出也。然陽氣已行於地上。故雷之聲人不聞而蟄蟲聞之。再言震者。三在兩震之間。過此以往。雷乃發聲。始爲震之行矣。互坎爲雷。坎加震則難生。故言貴。動之極止之中。震恐之心慮其中止。苟非震行則貴不能無也。傳言位不當者。三遠於初。非若二之乘剛。故蘇蘇者不至於喪。震行者無事於躋。其不當者。卽其所以無貴者耳。

九四震遂泥

震遂泥。未光也。四出外卦。正雷發聲之時。而象爲遂泥。何也。內卦從乾取義。外卦從坤取義。四位在乾則當大壯發聲之時。在坤則當觀卦收聲之時。所謂殺氣浸盛。陽氣日衰者也。遂者。四以一陽

陷四陰之中。周官遂人治野。夫間有遂。遂上有徑。考工記曰。廣二尺。深二尺。謂之遂。坎爲溝瀆。艮爲徑路。上下各二陰合。遂深廣之數。泥者。酉月水始涸。故坎水坤土合而成泥。凡雷之發。必聲與光並發。四之遂泥。震不動而陷且止。傳曰。未光。謂特未光耳。由四以至大壯之發聲而未光者。仍有光矣。雖無初之吉。亦無上之凶也。六五震往來厲。億无喪有事。

震往來厲。危行也。其事在中。大无喪也。五與二皆乘剛者。二震來厲。五震往來厲。舊解以二爲往。四爲來。夫二明云震來。何又謂之往乎。竊疑往來皆指四也。蓋外震取義於坤。故五之乘剛也。則爲來。而其乘遂泥之剛也。則爲往。發聲稱來。收聲稱往。其厲不以往釋。是往來皆厲也。傳曰。危行。卽論諸危行之義。二震來厲。邦有道之危行也。五震往來厲。邦無道之危行也。有事者。有事於宗廟社稷。一當戌月。是月也。大饗帝嘗犧牲告饒於天子。且所以給郊廟。

之事者無有所私。五在尊位。宜爲祭主。億者亦如月令。言合諸侯制百縣。爲來歲受朔日。與稅法百數。其事多矣。億無喪者。萬無失也。五有中德。萬萬無喪。其所有事。傳不曰其位在中。而曰其事在中者。中德二五所同。二所喪者。貝而已。非在尊位。則事非其所有也。五之有事。所關者大。乃必不可喪者。其事本屬行中之事。而責任於位中在上之人。故其無喪者。甚貴其中之能守也。其事皆大。有事故。其無喪亦爲大。無喪大其爲祭主也。彖所謂不喪七也。於五見之。

上六震索索。視矍矍。征凶。震不于其躬。于其鄰。无咎。婚媾有言。

震索索中未得也。雖凶无咎。畏鄰戒也。索索與蘇蘇相反。上於坤當亥月。自雷收聲於觀。蟄蟲坯戶。四爻當之。至剝而蟄蟲咸俯。在內皆瑾其戶。五爻當之上。值坤月。其生氣索然矣。然震乃陽氣。雖索索而生意未絕。物之蟄者。體不能動。惟目猶能視。而其視矍矍。

然瞪目直視而已。震究爲巽。巽眼多白。視矍矍之象。冬月義尚休。息行夏令。則方冬不寒。蟄蟲復出。故以征爲凶。傳曰中未得者。震行則有其事。在中之事。時不宜征。則未得其中之行也。上與三俱。兩言震者。卦交於三。成於上。明重震也。且也。蘇蘇索索之震。乃言震象。震行與震鄰之震。乃人心之震也。他卦言震。亦皆直指人心。惟蘇蘇索索不可言心。故俱再言其震。二四互艮爲躬。內外卦別體爲鄰。四特外卦之主。遂泥者。既陷而止。是震不於其躬也。初爲全卦之主。遠邇皆所驚懼。震必及上。是震於其鄰也。震鄰何以無咎。則於婚媾之有言見之。婚媾乃往來之義。純卦所無。而上與三應。其兩言震者同。其蘇蘇索索之象又同。故於鄰之中。獨稱婚媾。言卽笑言之言。三上在坤。皆兌體。兌言有則。乃告戒之詞。是匪畏於鄰戒。而何以無咎乎。

三三兼山艮。君子以思不出其位。天地間雷風水火皆以動爲用。

而終古不變者此山。山與山不相往來。故山雖兼而各有其位。艮在內卦爲得位。故言位中。互坎震坎有心象。心之官則思。震動欲出而敦艮以止之。所性分定。不容出也。艮不重。無以見時止時行之不失。故思不出位。非經卦所可言。人心朋從爾思。惟不安汝止故耳。如山之安。則安而能慮。而要以知止爲始。思者聖功之本。艮象人身。素位之學。正已而已。惟以位爲言。故艮之主爻雖在上。而位自在三。又非兌三之位不當者可比也。

初六艮其趾。无咎利永貞。

艮其趾。未失正也。八純卦各有一爻爲主。震主在初。艮主在上。他爻近者得之。遠者失焉。故震之外卦。雷乃收聲。艮之內卦。則初爲曲學。二三爲異端。初未入互體。不涉坎險。震躁之失。在初爲趾。艮其趾者。一跬步之必謹。硜硜小人。亦可爲士。故无咎也。然若尾生之信。陳仲子之廉。亦自托於信果。則艮趾而失其正者有矣。論卦。

則乾之貞在艮。論爻則初本坤之巽。永貞者坤道也。傳曰未失正。未之云者。艮初乾體雖未失。難保其常不失也。故利用永也。

六二艮其腓。不拯其隨。其心不快。

不拯其隨。未退聽也。一在趾上。其象爲腓。咸卦腓陰而隨陽。則以三爲隨。然隨雖在腓上。而屬於下體。故艮之腓隨。並言於二。艮陰分列於下。二柔在中。乃腓之象。互坎上下皆陰。而陽堅在中。乃隨之象。坎爲心。拯者拔也。震動爲拯。艮止故不拯。腓因足動。坐則不動。後世有以坐在立亡爲教者。艮其腓之象也。彼以寂滅常靜爲妙道。故必箕坐積年。諸見不動。離於衆相。外其形骸。曾不惜以其身飼禽獸。殉猛鷲。則雖隨與腓之相依已。若不相屬者。然是乃強制其心。其不拯者。直棄之而已。猶且謂易伏猛獸。難降寸心。夫心豈可降哉。天君泰然之謂快。若乃灰心滅智。勢必如厭趨者之反動其心。故傳以未退聽釋之。心位在上。故曰退。坎主聰明。故曰聽。

二居坎窞。坎爲心病。故不快。聖人蓋早知後世必有若告子之徒。流爲釋氏之教者。而立爲此象。後之譚瑞應經者。乃謂愍念天下三苦。惟是爲快。豈非陰竊吾儒之所不取者。而故反其詞以自文乎。後儒有以艮其背。不獲其身。爲無我。行其庭。不見其人。爲無物者。是又以聖人之辭。強合釋老之語矣。老子曰。吾所以有大患。爲吾有身。及吾無身。吾有何患。莊子以身爲委形。以死爲返真。其所謂不獲其身者。乃仇視其身心。又一變爲釋氏。則曰三身。曰百千萬億化身。其說尤巧於惑人。然不自知其心之不快也。不自知其厲薰心也。故必有快無薰夫。然後其道光明。

九三艮其限。列其夤。厲薰心。

艮其限。危薰心也。腰膝曰限。腰絡曰夤。三以一陽橫界於四陰之中。限之象也。陰兩分而陽聯絡之。夤之象也。艮其限者。限卽其心所止之處。老子所謂元牝之門。參同契所謂坎離匡廓。運轂正軸。

者彼術取抽坎填離以坎離爲車軸之貫轂一上一下輪轉於中而拘其交媾則正合坎輪艮拘之象且以坎離分列左右而謂金盛爲水木盛爲火左離右坎同廓中分是列其質也其自稱爲丹爐火候而世亦目之爲丹竈家凡皆以火爲運用故象薰心乃震雷之火薰之也後世老莊之學其弊爲申韓而流入於神仙道士艮之九三有焉二陰柔故不快三陽剛故厲厲亦得自軋三之惕而傳但言其危此其危之有咎者乎

六四艮其身无咎

艮其身止諸躬也四入上卦由曲學異端而返於正矣進乎限質未及於口輔其象爲身身雖統乎全體而專言之則腰足以上首以下乃謂之身艮其身似未能不獲其身矣然而不獲卽止之謂也則但曰艮其身而不獲之義已見且夫四之艮者其身也則其不見其人可知也外艮爲庭四互震則已有行庭之象矣四正當

背位而不言背者身之不獲必言背以見義若合言之則艮其身原不必復言背也具於身者視聽言動接於身者子臣弟友脩身固庸行之常也故以卦之無咎歸之傳獨於四言止亦以四爲艮其止止其所者也傳以躬釋身身乃盡人所同言躬則有行之義所謂躬行君子也

六五艮其輔言有序悔亡

艮其輔以中正也五上進於艮背有漸見光明者焉止德在心人不可得見而有爲心之聲身之文者則惟言艮其身者於身無所不止而口容尤以止爲貴輔者頰車上四爻互頤象輔獨以五當之者五出坎口得震雷之聲有言出於輔之象艮其輔非不言也時然後言言亦有序艮成終始故有序所謂成言乎艮也五以中正得止之時悔之亡非大賢以上不能也

上九敦艮吉

敦艮之吉以厚終也。上處重艮之終艮之時在上矣。處坎陷震動之外止德最純。故他卦以上爲頂爲角而在艮無取。仍取義於兼山。凡邱再成爲敦。敦艮卽重艮之謂。艮諸爻皆先言艮上獨曰敦艮。諸爻之艮必有以敦之而後合於時。故其艮皆有所止之處。一爻之艮也。上九於艮敦厚之至不可指名。乃全卦之艮也。艮坤同德。安土敦仁。坤之厚德也。傳曰以厚終。由初之永貞者至此而終。惟聖人然後可以踐形。此敦艮之吉乎。

三三山上有木漸。君子以居賢德善俗。木始生者爲升。根莖枝葉勃然以升也。木在地者爲觀。華實榮落燦然可觀也。山上之木。豈不然乎。而何獨爲漸。蓋木之在山其微細者。或驟望而莫辨。若旣顯然可指其爲木。則不必別其根枝。不必問其榮枯。而可知其由拱把以至尋丈者。必已經歷年歲而斷無有暴長而速成者。故不曰生木。不曰木在。而直以有木歸之於山。此其漸不於山。不著

也。人之有德猶山之有木。濯濯非山之性也。惛惛非人之性也。坎離爲心德。成德謂之賢德。成言乎艮居亦艮象止而蓄之之義。君子非自成已而已也。君子之德風。陰爲民。民各具有天命之性。賴君子申巽命以成化。繫水土之風氣。謂之風。隨君王之情欲。謂之俗。坤初積善巽風廣被。所以善之也。艮爲陽終。可久之賢德。要其終。巽爲陰始。易俗之善政。原其始。否之三四往來於人道。象兼自治治人而皆非可以蠲等。此漸義也。先儒或於居字下衍賢字。或於俗字上增風字。理則一耳。

初六鴻漸于干。小子厲有言无咎。

小子之厲義无咎也。彖言女歸。爻則別取鴻漸。易之六爻同一象者。獨有漸。傳則皆無釋焉。但於彖傳曰漸之進也。云爾。蓋物之行有序。至有時。性有別者。莫過於鴻。是以昏禮用之。大夫執鴈。用之時訓。月令雁凡四見也。艮爲鳥喙。巽值鵠尾。艮巽合則中互離。日

坎水鴻爲水鳥而有隨陽之義孟春自南而北仲秋自北而南此漸所以有取也鳥飛自下而高由于而磐而陸而陵所謂漸之進也初居地道之下坎水在前水畔爲干干雖近水已離乎水始進之義非以得水爲安失水爲危也艮爲小子近坎故厲始進未能取信或有從而非議者巽風爲言初又否坤之巽爻是以有言其言乃咎言也然初之於干乃漸於干者始進知厲則非躁進矣故傳以義許小子也

六二鴻漸于磐飲食衎衎吉

飲食衎衎不素飽也女歸之吉在四乃四僅無咎而二吉者四承五不如二之應五也二已互坎而象乃離於水者體艮之半石在河干艮爲小石聚石稱磐也鴻食則呼衆艮爲果蓏生於水石之間飲者飲坎水食者食艮果得所應而和鳴水火相應其象衎衎然衎者和也詩嘉賓式燕以衎是也傳曰不素飽者離爲腹坎中

滿有飽象。應五得願。故不素飽。飽非吉。不素飽乃吉也。

九三鴻漸于陸。夫征不復。婦孕不育。凶。利禦寇。

夫征不復。離羣醜也。婦孕不育。失其道也。利用禦寇。順相保也。三
爲艮主。而陷坎。似有水矣。互離爲乾卦。艮上則高。坎中則平。高平
曰陸。詩鴻飛遵渚。而後鴻飛遵陸。陸固鴻漸地也。三自否與四於
人道往來。皆爲卦主。卦取女歸。三至上。又互家人。故象夫婦。三本
否四震爻。爲征震體象。復艮止。故不復。四本否坤爲母。互離大腹。
互坎中滿。巽木生離火。火生艮土。有孕而將育之象。坎爲血卦。而
下漏。故不育也。陽三爲羣。同類爲醜。乾來下卦。自離其類。女歸不
以漸。而孕象見焉。不育者不可育也。婦之失道在孕。非以育爲得。
不育爲失也。失道宜凶。然卦利女貞。在三自有所爲利者。易每以
寇與婚媾並言。失道於夫婦者。自可得道於禦寇。坎寇禦以離兵。
寇因艮止。坤順而巽亦順。艮巽兩主相比爲保。三能以艮剛禦情。

欲則巽自無不順以正者止而巽故利也

六四鴻漸于木或得其桷无咎

或得其桷順以巽也 四乃巽主巽爲木鴻棲以聽不以爪棲木非宜木上何以有鴻則以其爲木之桷也桷非可必得者無意而得故或之四當離巽之陰陰來自坤爲均爲方非若坎艮之堅多心堅多節也桷非真榱乃木之似榱者耳四自坤進得巽位而承五故傳曰順以巽順巽宜當女歸之吉而僅无咎者以一陰上下比陽但免於咎卽已合利貞之義矣

九五鴻漸于陵婦三歲不孕終莫之勝吉

終莫之勝吉得所願也 大陸曰阜大阜曰陵四已加艮之上五又出四之上岡巒層出有若後世雁門雁宕之各山者漸陵象也婦亦指四五雖應二而女歸實出於四初二之陰皆在陽卦惟四當陰卦之陰則婦非四莫屬矣五不稱夫居尊故也女適人乃稱婦

巽體象姤。四在五內。是女已歸者。四互離。腹爲孕。乾金生坎水。五出坎滿。但有離虛。故婦不孕。八卦之位。巽至乾則隔離。坤兌三卦。乾至巽則隔坎。艮震三卦。故象三歲五中四正。不牽情欲之感。四進以正。終必佐五以正。邦坤以大終。婦之德莫有過於四者。巽木克艮土。而中互離。則木生火。火生土。故曰終莫之勝。女歸之吉。在男不在女也。傳曰。願者巽之志。得者艮之成也。

上九鴻漸于陸。其羽可用爲儀吉。

其羽可用爲儀吉。不可亂也。高至陸而已極。巽爲進退。進極仍退。鴻自北而南。復自南而北。衡山位鎮南離。而衡有翅雁之峰。此自陵返陸之象也。上本艮爻。故與三同爲漸陸。處卦之外。不爲世用。鳥飛在羽。上旣由進而退。故不言其飛。但稱其羽。司常九旗。全羽爲旌。析羽爲旌。曲禮。前有車騎則載飛鴻。此皆畫其羽而載之所謂儀也。儀者禮儀。巽離皆位南方。故主禮。又上有旗象。左傳火焚

其旗指上爻也。鴻之自漸不爲人用，可用者獨其羽耳。老成典型，足爲當世之儀式。故吉傳曰：不可亂者，潔身恐有亂倫之譏。上能用九，其外之可爲儀，由其中之不可亂。漸與蠱上下易，蠱終於艮，不事王侯，漸終於巽，亦有羽儀。其不可亂者，猶之乎志可則也。蠱有所不可，故傳以可則稱之。漸有所可，故傳以不可亂明之也。

三三澤上有雷，歸妹。君子以永終知敝。屯曰：雲雷，解曰：雷雨。雷無震於水者，而澤則有之。雷在澤上，雷發而澤氣隨之以升，非若澤中之雷與時休息而爲隨也。妹爲震之所歸，而乃言澤上者，雷爲澤所感，卑陷陰濕之區，陽伏於下而奮迅以出，由陰氣沈滯所致。是雷之動以悅而動，雷若有不能自主者。震爲陽始，兌爲陰終，兌下震上，不曰終則有始，而獨言終之敝者，易惟艮道成終，兌與艮反，故終必有敝。反艮爲震，故敝貴能知。然非永終者不能知也。互坎爲敝，互離爲知。永乃坤之永貞，知則乾之易知。歸妹女之終，故

言終知險知阻故得所歸而大也

初九歸妹以娣跛能履征吉

歸妹以娣以恒也跛能履吉相承也。爻稱歸妹者凡四豈謂爻皆妹象哉妹自屬兌歸自屬震惟初本泰乾之震爻上本泰坤之兌爻故初與四三與上象義相通三爲妹二最近三而在下女弟爲娣古者天子一娶四國諸侯一娶三國各以娣姪從娣則無備禮或不及年者有矣二爲娣而於初言者初震體而近承於二有兌歸於震之義也傳曰以恒者恒常道也恒下卦巽歸妹下卦兌兌倒爲巽疑若相反然恒與歸妹之不同在初與三而二之剛中未變以者以爲內助初之以娣正以其恒也以娣何以吉初震體爲足合外之震足有二矣遇兌毀則一足已跛跛而猶能履者跛不利專行而利依倚卦之無利在柔乘剛凡自柔言之爲乘剛者自剛言之爲承柔二四皆剛承柔初獨以剛承剛剛相承故能履而

震足征行矣卦義征凶初乃征吉豈非以其不爲柔乘耶

九二眇能視利幽人之貞

利幽人之貞未變常也二不言歸妹者二爲娣而以娣已育於初故但稱其德跛與眇非謂娣也歸妹之人任娣而不任妹則爲跛眇之偏於用耳二在泰乾伏離乾易兌則互離而伏象已隱是亦兌毀之而二目眇其一也離光在剛二比初兩剛相接故能視中爲人位二在西夕之中稱幽人兌德悅以利貞三位不當故貞不在三而在二蓋貞卽初所謂恒也三四往來而二未嘗變則卦之無攸利者已利矣利不在女仍在男也

六三歸妹以須反歸以娣

歸妹以須未當也三乃所歸之妹也三本泰坤之巽爻巽震相與道斯恒久易兌則有小人之象與四相比而下之更天官書北宮須女注云須賤妾之稱夫三旣爲妹何以賤乎此非三本賤也跛

眇者賤之耳。兌與巽反。三以巽易兌。故象反歸。反歸者大歸也。禮婦人謂嫁曰歸。明外屬也。反曰來歸。明從外至。爲夫家所遣。三與四。易其反也。爲震言也。娣卽二也。初所謂歸妹以娣者。至三而其義乃見。蓋初之以娣。乃因四視三。爲須女故耳。謂須女不謂之妹。是猶未歸也。妹當歸而不歸。則有若反歸者焉。然三已許嫁。要自有以貴行之時。故傳曰未當。而不言位未當。非不當也。其位在中者。六五三以五之位爲位。是必五以之行。而乃貴。故此時猶未耳。九四歸妹愆期遲歸有時。

愆期之志有待而行也。四爲歸妹之主。士如歸妻。非四莫屬。然而歸妹有期焉。有時焉。離日坎月。合以成時。四與三易。三爲妹而四歸之。此四所期者也。乃三旣已反。反則非四配矣。何云歸妹乎。四上承五。歸期在焉。特遲耳。三待五行。故其期愆。坎交震當寅。則月已隱。離交兌當酉。則日已落。期之過而爲愆也。時者五之時。此非

無時也。離日始出於震東坎月甫生於兌西時之未及而爲遲也。六五帝乙歸妹其君之袂不如其娣之袂良月幾望吉。

帝乙歸妹不如其娣之袂良也其位在中以貴行也。五居尊而比

四卦以女下男而凶惟帝女則有下嫁之禮帝出乎震震木之陰在乙居五故象帝乙妹自指三歸自指四三非忽賤忽貴也三與五貴賤之等自三比四言之則賤自五同功及之則貴三爲卦主稱女君袂者衣口也衣在上而袂下垂泰乾在下之象也衣袂隨手上下兌口向上之象也二五相應故於五言之二三皆體兌故皆言袂三陰二陽陽爲良二五離外光三互坎內隱故不如其良也互離互坎日月相望坎兌同體故易言月幾望皆兌象兌三爻受離光者有二月之生明由兌西歷離南以至震東未及於望曰幾望不滿之詞也帝女知二之賢自以爲不如不挾其貴婦道無失天地之大義在焉是以吉也傳言其位在中者五位在中五貴

則三亦貴。三自行乃凶。五以三而行則吉。日以貴行明乎。三非須之賤者也。

上六女承筐无實。士刲羊无血。无攸利。

上六无實承虛筐也。

上處震極。特以征凶戒之。女之于歸。費用榛

栗棗脩。需筐盛之。震爲竹木。而象仰盂。是筐也。上在泰處互震之

外。四進成震。上入震體。筐承之矣。陰虛陽實。上之坤陰不改。是無

實也。士女同牢之禮。宜當用羊。兌爲羊。四以離兵刲之。刲必有血。

坎爲血。卦非無血也。而上已出互坎之外。世無刲不見血之羊。而

有刲不及取之血。是惟有坎。故言血。亦惟上與坎隔。故無血。上雖

泰坤之兌爻。與四同其震體。無配合之義。兌不成婦也。女焉而已。

震不成夫也。士焉而已。承筐刲羊。當屬三四。而無實無血。至上乃

見其無。故以象之無攸利歸之。而特繫之曰。上六無實。卦之無利

在乘剛。乘剛者五。而上積陰於上。與同震動。吉在五。則無利獨屬

於上矣。不然無實卽虛義豈有二哉。

三三雷電皆至豐。君子以折獄致刑。豐取日之明動不可曰日上雷。雷下日也。惟傳更以雷爲主則離不爲日而爲電。有至理存焉。雷電與噬嗑同而豐則雷在內電已在外。是電至而雷卽至。故曰皆至。聲光並著。豐之象也。法電之明以折獄。法雷之動以致刑。其用在臨事故與噬嗑之明敕先時立制者有異。其所行固卽先王之法而臨時明斷。惟君子能善其用。離在內爲當位。震在外爲出威。離爲垣墉有獄象焉。震雷爲殺有刑象焉。互兌則決折以折之。互巽則進退以致之。噬嗑之明敕離重於震。尙其明也。豐之折致震重於離。尙其威也。

初九遇其配主雖旬无咎往有尙

雖旬无咎過旬災也。豐由二成二在泰居四與初陰陽相應有配之義來爲內卦之主是曰配主。初承二爲遇旬者。天干之總數象。

言日則有中存辰。爻言月則有上中下三旬。初當初旬。未及於望。盡初之數。不過十日。必無過中之慮。故曰雖旬無咎。初本泰乾之震。爻震動爲往。王者尙大。惟初之往能有之。傳曰過旬災者過旬。乃無定之數。過中與不過中皆不可知。如二往得疑疾。卽爲災矣。離火言災。初自不至於過。知過之災則知旬之所以無咎矣。

六二豐其蔀日中見斗。往得疑疾。有孚發若吉。

有孚發若信以發志也。二爲離主。宜日中者似在二矣。乃二本泰

坤之巽。爻又互巽。巽木高長。又爲蕃鮮。其象草木盛而爲蔀。長林豐草。日之明照不及焉。二所謂豐特豐其蔀耳。且不但日不照而已。日爲月掩。則日有食之。兌爲月。巽爲隱。日食則大星先現。震體仰孟於星象斗。離目見之火動爲往。巽進退爲疑。巽風生疾。疑疾以互巽得之。破其疑者在信。離土主信。風自火出。所以發也。發其志以發人之志明。明與動相資有孚於往乃吉矣。曰發若者。信本二

所自有無待於發而不啻發之也

九三豐其沛日中見沬折其右肱无咎

豐其沛不可大事也折其右肱終不可用也三與初爲離外光宜

有同德乃三五異又互兌水草交生其象爲沛離就燥而沛利濕

義相背矣三當日昃而亦云中者三四乃中行之位也見斗已有

日食旣之象而三加甚焉沬者九家謂斗杓後小星薛氏謂斗之

輔星但輔只一星杓後何星亦無指名似皆臆度竊思沬與昧同

音而字從水義取瀑沬是不過泛指小星震陰是也沬亦見不止

見斗矣豐時尙大然不可自大其事三至晦闇故傳以不可大戒

之若謂事之大者豈小事遂可妄爲哉離兩剛猶人兩肱上爲右

下爲左肱之用右勝於左兌折其右則左雖無恙不可用矣三卽

不自大其事亦終無能爲也猶無咎者離剛在三信以發志二必

連三以爲用也

九四豐其蔀日中見斗遇其夷主吉

豐其蔀位不當也日中見斗幽不明也遇其夷主吉行也四與二互易二主離四主震故豐蔀見斗與二畧同四已出離體互巽進退進極必退震又象復乃日食盡限而有復初之象始復則小星先隱惟斗尙見也夷主指二夷卽明夷之夷卦與明夷異者在四之一爻故四以二爲所夷之主由闇復明爲遇四之遇二由二以有孚者發四志而使之行雷之動先以電也旣得所遇四與二同吉矣豐蔀見斗之義傳不釋於二而釋於四者二爲明體傷自外來四在泰二伏離本明易震互兌則幽是傷明乃四之所爲四之幽不明又由於位不當二四異位離居內爲當震居外爲不當四幸以遇主得吉苟非震行何以吉哉

六五來章有慶譽吉

六五之吉有慶也

五則日復初矣五本泰坤之離爻火必以陰爲

質應二乘四四從二來是四亦二也故於二爲往者於五則爲來
離震之主於五皆有來附之象故曰來章章者離之光明也互兌
悅故有譽譽止及身故必有爲天下之慶者而其舉乃可貴乾爲
福慶震得乾元故言慶傳曰六五之吉明二四之吉皆其吉也五
不言豐嘉其不自大也

上六豐其屋蔀其家闕其戶閭其无人三歲不覲凶

豐其屋天際翔也闕其戶閭其无人自藏也上處來章之後動極
必止有豐反爲旅之義焉卦下四爻互家人上四爻互歸妹有室
家之象上在天道震爲木巽爲工若作宮室其高凌雲宮室取諸
大壯卦與大壯異者在二之一爻故下三句卽從二取象夫屋之
足以待風雨者爲壯固而不動耳上乃動極故傳曰天際翔也天
際謂在天道之上翔者鳥飛欲下之貌小過上卦亦震上當飛鳥
離之之父屋不可翔翔因地震凡地震多在日食之後屋動則傾

震將反而爲艮也。屋中有人斯稱家室。二四爲成卦之主。二四皆豐其蔀。合觀之。是爲榛棘充塞於庭戶。而蔀其家矣。二陰在下。象戶。人位。稱人。離目。闕之中互大。過死象。故無人寂無人聲之謂聞。火雷俱有聲。上在卦外。故曰聞。覲者物之見乎離也。反豐成旅。必歷艮之三爻。故曰三歲不覲。傳言自藏者。人在蔀中爲藏。棟折榱崩。由上躁動致之。是上自藏之也。旅初取災。卽初所謂過旬災者。是以凶也。

三三山上有火。旅君子以明慎用刑而不留獄。火不自炎。因物以發。亦逐物而遷。爐竈之積薪物聚而有可繼。火之傳而無盡也。野燒之延緣物散而隨所之火之過而不留也。火必寄托於物。有同寓借。山上之火逐草而行。於時甚暫。而旅之卦因以名焉。旅因豐而言獄。猶之賁因噬嗑言折獄也。火焚象刑。艮限象獄。互兌決則刑之用也。互巽入則獄之留也。離文明。艮亦光明。明由靜生。艮用

九離用六寬猛相濟所謂慎也離互巽入艮義尚止或恐明慎之過失在遲留君子折獄當如火之過山曾不少留凡水木金土皆有形留惟火過則雖灰燼留於山而火固不留此其義也

初六旅瑣瑣斯其所取災

旅瑣瑣志窮災也初自豐上失居反退處下艮爲小石以陰承陰其象瑣瑣瑣者小也凡人出門之始未有所爲先有其志初反大爲小斯者賤也艮爲闕寺是執斷賤之役者旅必有所而初乃執役於人以人爲政是故初無所也斷卽其所耳處艮門之下未入互巽無志可言則志已窮矣且也豐旅之異在初上兩爻離火爲災上以剛無所容而焚巢初以柔斯其所去災雖遠而艮手若有以取之人奴之生得無笞辱足矣斷之災不必在大也豐初傳曰過旬災也似因此文言之

六二旅卽次懷其資得董侯貞

得童僕貞終无尤也。二處見門之中互巽爲入兌西日久入於門有宿地矣。再宿曰信。過信曰次。卽者就也。巽進退於其地也。旅藉資財。巽利在艮手之中。資不求索於外。故曰懷旅。賴童僕少男爲童。闢寺爲僕。初本否坤之巽爻。而在二下。是乃童之貞者。二在否互艮。不及於初。易旅而初亦爲艮。是得之也。傳獨舉童僕而曰終无尤。尤者尤人也。尤非旅中所宜。卽次需人使令。懷資賴人防守。無童僕則所遇皆其所尤。而因以致人之尤。童僕不貞則所尤卽在童僕。而童僕亦尤之。是故貞在童僕未足爲旅之吉。而論旅之貞必及焉。要其終所以難其得也。

九三旅焚其次喪其童僕貞厲

旅焚其次亦以傷矣。以旅與下其義喪也。三來自否乾爲艮之主。有其次矣。坤往乾而成離。三之艮廬與離火相接。巽風揚之互兌爲燬。有焚次之象。五在否三互艮乃童僕之貞者。否五乘艮爲五

童僕五三易而離爲別離則喪矣傳曰亦以傷對號咷而言也旅之三五卽豐之四二在豐則四當以二爲主而遇之在旅則三不可以五爲僕而喪之蓋往來之道陽剛爲重豐之陽上往是四以豐之大與上卦也旅之陽下來是三以旅之小與下卦也陽主義義不在得而在喪則喪卽其貞三之厲三之能因時而惕也

九四旅于處得其資斧我心不快

旅于處未得位也得其資斧心未快也卦成於三五而四介其中故同在旅而四若獨得安處者詩曰于時處處于時臚旅處以安民旅以待客久旅則有處象矣巽利爲資兌金加巽木爲斧貨財與防衛四皆以久處得之而其心顧不快者何也離爲心兌悅爲快旅中貴得所主四上承五下乘三在兩卦主間一動一止難於適從故語資斧則得而語所處之位則未得安處在境而不安處者在心故曰我心此非常不快也特未快耳快不快惟我自知之

其故在位不在資斧也。

六五射雉一矢亡終以譽命

終以譽命上逮也。五不言旅五居尊位四海一家無所謂旅也。惟遇田獵或外出焉。離爲雉五乃射雉之人非謂五爲雉也。五來自坤田否坤伏離上四爻互睽弧矢之象否乾三陽去其一而成離乾金中直是乃矢也互兌脫爲亡矢亡卽射象也。所亡僅一矢正見得之之易不待再三射乃始事其終且有後命矢自上及下。以悅爲譽否五下居於三互巽爲命其譽出於上而其命則有自上逮下者。上卽指五五順艮剛故有褒嘉之命逮於艮艮何譽譽其能止而麗乎明也。射之爲言或曰舍也舍與止同義。經首之詩曰以燕以射則燕則譽卽此譽也。

上九鳥焚其巢旅人先笑後號咷喪牛于易凶

以旅在上其義焚也喪牛于易終莫之聞也。豐上失居旅上亦有

無所容之象。山上之高者莫如木。惟鳥能作巢於木上。離爲飛鳥。離木中。科外槁而兌附決於巽木之顛。此巢也。旅象野燒。由焚次而及於木上之巢。旅之離卽豐之離。故曰其巢旅上。卽豐初日動。則明火止則焚。故以豐在下。則遇二而有尚。以旅在上。則遇五而無容。乾寄於坤爲旅地。坤入於乾爲旅人。離火有聲。故笑。咷並見。失居者。歷艮三爻而覲離。喜其高。故笑。悲其焚。故咷。同人親也。則先號咷而後笑。旅人親寡。則先笑後號咷。義相通也。巢焚則牽牛服賈。旅資盡失。離牛來自坤田。有疆場之象。兌脫爲喪火之焚物。焦土乃已。焚則巢牛之象俱隱。傳曰終莫之聞者。此兼以証五終。譽命之義。譽命自五逮下。而上不及焉。離反坎。故不聞。先曰以旅在上。明其已在上。逮之上。後曰終莫之聞。則見五所謂終者。以下之艮剛爲終。而非卦終之謂也。